

Na osnovu člana 10. i 12. Zakona o udruženjima i fondacijama Bosne i Hercegovine („Sl. glasnik BiH“, br. 32/01 i 42/03), Osnivačka skupština Asocijacije infektologa u Bosni i Hercegovini na sjednici održanoj u Sarajevu dana 28.12.2004. godine, donijela je:

STATUT

ASOCIJACIJE INFEKTOLOGA U BOSNI I HERCEGOVINI

I - OPŠTE ODREDBE

Član 1.

Udruženje koje je osnovano Odlukom o osnivanju na Osnivačkoj skupštini održanoj dana 28. decembra 2004. godine, u skladu je sa Zakonom o udruženjima i fondacijama Bosne i Hercegovine i nastavlja rad Udruženja infektologa Bosne i Hercegovine, osnovanog u oktobru 1994. godine.

Član 2.

Udruženje infektologa u Bosni i Hercegovini je samostalno, dobrovoljno, strukovno i naučno udruženje naučnih i stručnih radnika iz oblasti infektologije i srodnih naučnih disciplina (epidemiologije, mikrobiologije, farmakologije, grana interne medicine, pedijatrije, hirurgije, patologije, eksperimentalne medicine) udruženih radi razvijanja i unaprijeđenja stručnog i naučnog rada infektologije.

Član 3.

Ovim Statutom u skladu sa članom 12. Zakona uređuje se:

- puni i skraćeni naziv i sjedište udruženja;
- ciljevi udruženja;
- postupak za primanje i isključivanje članova udruženja;
- organi udruženja;
- pravila za ostvarivanje, korištenje i raspolaganje sredstvima udruženja i nadzor nad korištenjem tih sredstava;
- javnost rada;
- postupak za izmjenu i dopunu Statuta i donošenje drugih opštih akata;
- oblik i sadržaj pečata;
- zastupanje udruženja;
- uslovi i postupak za pripajanje, razdvajanje, transformaciju ili prestanak rada udruženja;
- druga pitanja od značaja za organizaciju i djelovanje udruženja.

II - NAZIV I SJEDIŠTE ASOCIJACIJE

Član 4.

Puni naziv udruženja je:

Asocijacija infektologa u Bosni i Hercegovini
Asocijacija infektologa u Bosni i Hercegovini
Асоцијација инфектолога у Босни и Херцеговини

Skraćeni naziv udruženja je:

AIBiH
AIBiH
АИБиХ

Naziv udruženja je istovjetan na sva tri službena jezika koja su u upotrebi u Bosni i Hercegovini, a službeno će se koristiti na latinici i ćirilici.

Član 5.

Sjedište udruženja je: Klinika za infektivne bolesti, Bolnička br. 25.

Član 6.

Udruženje stiče svojstvo pravnog lica danom upisa u registar kod nadležnog organa.

Član 7.

Udruženje će djelovati na cijelom području Bosne i Hercegovine.

Član 8.

Udruženje je strukovna, multietnička, nestranačka i nevladina organizacija osnovana radi ostvarivanja zajedničkih interesa članova udruženja, bez namjere sticanja profita.

Član 9.

Znak udruženja je šematski prikaz granica Bosne i Hercegovine izvučen tirkiznom bojom, s lijeve strane stoji skraćeni naziv AIBiH latinicom, a s desne strane ćirilicom АИБиХ.

Član 10.

Pečat udruženja je okruglog oblika, prečnika 4 cm, sa punim nazivom udruženja upisanim latinicom i ćirilicom, i sjedištem udruženja Sarajevo, a u sredini je znak udruženja.

Član 11.

Ukoliko udruženje ima više pečata, svaki pečat se označava odgovarajućim brojem.

Skupština će donijeti Pravilnik kojim se bliže uređuje način upotrebe i čuvanja pečata udruženja.

III - CILJEVI UDRUŽENJA

Član 12.

Osnovni programski ciljevi odnosno djelatnosti udruženja su:

- okupljanje infektologa i ostalih srodnih naučnih disciplina (mikrobiologa, epidemiologa, farmakologa, internista, pedijataru, hirurga, patologa, specijalista eksperimentalne medicine), kako bi svojim stručnim radom doprinijeli razvoju infektološke struke;
- razvijanje etičke svijesti i odgovornosti članova udruženja;
- stalna saradnja sa odgovarajućim stručnim organizacijama i institucijama u Evropi i svijetu;
- stručna izdavačka djelatnost u svrhu informisanja svojih članova i javnosti o razvoju infektološke stručne i naučne misli;
- saradnja sa sličnim udruženjima i drugim organizacijama u zemlji i inozemstvu.

Član 13.

Utvrđene ciljeve udruženje ostvaruje na način određen Zakonom, ovim Statutom i drugim opštim aktima udruženja.

IV - POSTUPAK ZA PRIJEM I ISKLJUČIVANJE ČLANOVA

1. Postupak prijema

Član 14.

Članovi udruženja su infektolozi u Bosni i Hercegovini, koji se mogu organizovati u entitetska i kantonalna udruženja i u sekcije, kako unutar udruženja tako i u većim medicinskim centrima.

Članovi udruženja mogu postati i drugi građani Bosne i Hercegovine, kao i strani državljani koji se bave navedenom problematikom ili su na neki način za nju vezani, ako podnesu zahtjev za prijem u članstvo i potpišu izjavu o prihvatanju ciljeva i Statuta udruženja, kad budu primljeni u članstvo na Skupštini udruženja na prijedlog Upravnog odbora.

Počasni član udruženja može postati infektolog ili ljekar druge srodne naučne discipline bez obzira na mjesto rada i boravka, koji je osobito zaslužan ili za rad udruženja ili za razvoj infektološke ili druge slične naučne discipline. Odluku o dodjeljivanju počasnog članstva donosi Skupština udruženja.

Član 15.

Članstvo u udruženju je dobrovoljno.

Član 16.

Udruženje može imati i prijatelje udruženja.

Prijatelji udruženja mogu biti fizička ili pravna lica koja će pružati stručnu i drugu pomoć udruženja za ostvarivanje i unaprijeđivanje njegovih ciljeva i aktivnosti na naučnom i stručnom planu (to se reguliše posebnim Pravilnikom).

Član 17.

Lica iz člana 14. ovog Statuta stiču svojstvo člana udruženja na osnovu zahtjeva za prijem u članstvo i izjave o prihvatanju ciljeva i Statuta udruženja.

Član 18.

Zahtjev za učlanjenje podnosi se udruženju, na adresu sjedišta udruženja.

Član 19.

Članom udruženja postaje se dobrovoljnim pristupanjem. O prijemu u udruženju odlučuje Upravni odbor udruženja na osnovu pristupnice o čemu se vodi posebna evidencija u sekretarijatu. Pojedinaac kojemu se ospori pravo na članstvo može se žaliti Skupštini, čija je odluka konačna.

Član 20.

Članstvo u udruženju prestaje:

- istupanjem člana
- isključenjem člana

Član 21.

Svaki član može istupiti iz udruženja krajnje do 31. decembra tekuće kalendarske godine, na osnovu pismene izjave o istupanju koje dostavlja Skupštini udruženju, 60 dana prije istupanja.

Kao dan prestanka članstva smatrat će se 31. decembar tekuće godine.

Član 22.

Član udruženja koji grubo krši Statut, ne izvršava svoje obaveze, ili svojim postupcima nanosi štetu ili narušava ugled udruženju, može biti isključen.

Prije donošenja odluke o isključenju, član udruženja mora biti obavješten o prijedlogu za isključenje kao i o razlozima zbog kojih se predlaže isključenje. Članu udruženja se mora ostaviti rok od 60 dana za izjašnjenje o pokrenutom prijedlogu za isključenje iz udruženja.

Prijedlog za isključenje člana može podnijeti svaki član udruženja. Odluku o isključenju člana donosi Skupština udruženja na prijedlog Suda časti.

Protiv odluke Upravnog odbora, u roku od 30 dana, može se izjaviti prigovor Skupštini udruženja, koja će preispitati odluku i čija odluka donesena po prigovoru je konačna.

Član 23.

Član udruženja koji istupi ili koji je isključen, dužan je izvršiti obaveze prema udruženju dospjele do dana prestanka članstva.

Član 24.

Skupština udruženja može donijeti opšti akt, kojim će se u skladu sa ovim statutom, bliže urediti način i postupak stupanja u članstvo i prestanak članstva.

Član 25.

Članovi udruženja imaju slijedeća prava i obaveze:

- da biraju i da budu birani u organe udruženja
- da aktivno učestvuju u ostvarivanju ciljeva udruženja
- da budu redovno i blagovremeno obavještavani o aktivnostima udruženja
- da sarađuju sa ostalim članovima udruženja
- da čuvaju i podižu ugled udruženja
- da ostvaruju druga prava i dužnosti utvrđena Statutom i opštim aktima udruženja

V ORGANI UDRUŽENJA

Član 26.

Organi udruženja su:

- Skupština
- Upravni odbor
- Predsjednik udruženja
- Sud časti
- Udruženje može imati i druge organe kao što su komisije udruženja, nadzorni odbor, te druga radna tijela udruženja o čemu se donosi odluka na Skupštini a formiranje novog organa se prijavljuje nadležnom organu za registraciju.

Skupština

Član 27.

Skupština udruženja je najviši organ udruženja, koji čine svi članovi udruženja.

Član 28.

Skupština udruženja nadležna je za:

- donošenje Statuta, izmjena i dopuna Statuta i drugih akata određenih Statutom;
- odlučivanje o pripajanju, razdvajanju, transformaciji, raspuštanju i prestanku rada kao i o drugim statusnim promjenama u udruženju;
- izbor i razrješenje Predsjednika i drugih organa udruženja;
- donosi godišnji program rada udruženja i njegovih organa;
- Pravilnik o dodjeljivanju priznanja i nagrada udruženja;
- razmatranje i odlučivanje o izvještajima koje podnosi predsjednik i drugi organi udruženja;
- bira počasne članove udruženja na prijedlog upravnog odbora (UO);
- donošenje odluke o pohvalama i nagradama zaslužnim članovima na prijedlog UO;
- odlučivanje o visini i načinu plaćanja članarine;
- odlučuje o raspolaganju imovinom udruženja;
- donošenje odluke o promjeni naziva udruženja;
- odlučivanje o drugim pitanjima koja nisu u nadležnosti drugih organa udruženja;

- Bliže odredbe o načinu rada Skupštine, glasanja, odlučivanja, upućivanja poziva za sjednice, vođenju zapisnika i drugim pitanjima od značaja za rad Skupštine uređuju se Pravilnikom o radu.

Član 29.

Skupština udruženja se sastaje po potrebi, obavezno poslije Kongresa i najmanje jednom godišnje. Skupštinu saziva predsjednik/zamjenik predsjednika udruženja najmanje 15 dana prije njenog zasjedanja. Predsjednik/Zamjenik predsjednika udruženja je dužan sazvati Skupštinu u slučaju kada to zahtjeva najmanje jedna trećina članova Skupštine.

Član 30.

Sjednice Skupštine udruženja održavaju se kao redovno zasjedanje, vanredno zasjedanje i Kongres.

Redovno zasjedanje se održava najmanje jednom godišnje.

Vanredno zasjedanje se može sazvati u slijedećim slučajevima:

- na zahtjev predsjednika udruženja
- na zahtjev članova udruženja sa najmanje jednom trećinom glasova koji predlažu sazivanje zbog:
 - isključenja člana udruženja
 - izmjena Statuta udruženja
 - prestanka rada udruženja
 - radi rješavanja urgentno nastalih problema

Član 31.

Svaki član udruženja Skupštini može prisustvovati lično i kod odlučivanja na sjednici Skupštine ima 1 glas.

Član 32.

Skupština udruženja ima kvorum za rad ako joj prisustvuje više od polovine ukupnog broja članova.

Član 33.

Skupština udruženja odlučuje većinom glasova prisutnih članova, osim o pitanjima koja se odnose na prijem novih članova i prestanak svojstva člana udruženja, o kojima se odluke donose dvotrećinskom većinom prisutnih članova.

KONGRES UDRUŽENJA

Član 34.

Kongres saziva Skupština udruženja na prijedlog upravnog odbora zbog široke i opšte debate o najznačajnijim problemima djelatnosti i zdravstvene zaštite u oblasti infektologije i o drugim pitanjima od značaja za rad, položaj i ugled udruženja, kao i njegove uloge u društvenoj zajednici.

Kongres se u pravilu saziva jedanput u četiri godine, a po potrebi može i ranije, ili kasnije, ukoliko to uslovi dozvoljavaju ili ukoliko se to na Skupštini odluči.

Član 35.

Kongresne teme verificuje Skupština udruženja na prijedlog Upravnog odbora i bira Kongresni odbor koji vrši poslove oko pripreme i održavanja Kongresa.

Kongresni odbor obrazuje pomoćna tijela koja su neophodna za rad Kongresa. Kongresni odbor, podnosi izvještaj udruženja o toku priprema Kongresa i po održanom Kongresu.

Kada Skupština udruženja prihvati izvještaj Kongresnog odbora, odbori Kongresa se raspuštaju. Priznanja dodjeljuje Kongres ili Skupština udruženja.

Predsjednik udruženja

Član 36.

Predsjednik udruženja saziva i rukovodi sjednicama Upravnog odbora. Brine se i odgovoran je za ostvarivanje odluka Skupštine i Upravnog odbora, te pridržavanja zakonitosti rada udruženja na osnovu Statuta.

Član 37.

Predsjednik udruženja se stara o realizaciji programskih planskih zadataka i poštivanja zakonitosti u radu, realizaciji odluka i drugih akata udruženja predstavlja i zastupa udruženje u zemlji i inostranstvu.

Član 38.

Predsjednika udruženja bira i razrješava Skupštinu većinom glasova prisutnih članova Skupštine na period od četiri godine, sa mogućnošću ponovnog izbora.

Predsjednik za svoj rad odgovara Skupštini.

Predsjednika udruženja u slučaju njegove odsutnosti ili spriječenosti za rad, zamjenjuje jedan od tri potpredsjednika i to član upravnog odbora koji je iz predsjednikove matične kuće, sa svim obavezama, ovlaštenjima i pravima predsjednika udruženja.

Predsjednik udruženja može biti penzionirani infektolog, zamjenik mu je član upravnog odbora iz njegove matične kuće.

Član 39.

Predsjednik udruženja je odgovoran za provođenje utvrdjene poslovne politike udruženja kao i za neostvarivanje planiranih poslovnih rezultata udruženja.

Predsjednik udruženja je dužan najmanje jednom godišnje podnijeti pismeni izvještaj o radu udruženja na usvajanje Skupštini.

Sekretar udruženja

Član 40.

Sekretar udruženja osigurava realizaciju zadataka udruženja koji su mu povjereni odlukama Skupštine i Upravnog odbora.

Sekretar udruženja imenuje se na četiri godine i nakon isteka tog perioda može biti ponovo imenovan.

Član 41.

Sekretar udruženja priprema materijale za sjednice tijela AIBiH-a, pomaže predsjedniku/podpredsjedniku u izvršavanju odluka Skupštine i Upravnog odbora te obavlja i druge poslove koje mu povjeri Upravni odbor i Skupština.

Član 42.

Sekretar udruženja je obavezan prisustvovati sjednicama tijela AIBiH-e i zastupa udruženje prema punomoći i opsegu koje utvrđuje Upravni odbor posebnom odlukom.

Upravni odbor

Član 43.

Upravni odbor udruženja vrši funkciju izvršnog organa udruženja, koji obavlja poslove između dva zasjedanja Skupštine, a na načelima utvrđenim ovim Statutom i smjernicama dobivenim na Skupštini udruženja.

Upravni odbor obavlja slijedeće poslove:

- priprema sjednice Skupštine udruženja;
- priprema nacrt Statuta i drugih akata koje donosi Skupština;
- provodi politiku, zaključke i druge odluke koje je donijela Skupština;
- podnosi godišnji i periodične izvještaje o svom radu Skupštini;
- ostvaruje kontakte s preduzećima (firmama), ustanovama, institucijama i drugim pravnim i fizičkim licima u cilju obezbjeđivanja sponzorstva za aktivnost udruženja;
- obavlja druge poslove predviđene Statutom i aktima udruženja.

Upravni odbor ima sedam članova: Predsjednik udruženja i još šest drugih članova (po jedan sa Infektivne Klinike/Odjel u BiH) koje bira Skupština.

Mandat članova Upravnog odbora traje četiri godine s mogućnošću ponovnog izbora. Nitko ne može biti biran više od dva puta uzastopno. Odluke donosi nadpolovičnom većinom glasovima prisutnih članova.

Unutrašnja organizacija udruženja

Član 44.

U okviru udruženja mogu se obrazovati sekcije po granama specijalnosti (gastroenterologa, mikrobiologa, pedijataru, neurologa).

Uloga sekcije je da unapređuje aktivnosti i ciljeve udruženja na cijeloj teritoriji Bosne i Hercegovine.

Sekcije izvještavaju Skupštinu o svom radu za tekuću finansijsku godinu (o stručnom i finansijskom radu, ali Skupština ne utiče bitno na njihov rad).

Udruženje može imati i svoje kancelarija izvan svog sjedišta, o čemu odluku donosi Skupština, na prijedlog Upravnog odbora i ovom odlukom se utvrđuje opseg domena itd.

Imovina udruženja i korištenje i raspolaganje sredstvima udruženja

Član 45.

Imovinu udruženja čine: prava, stvari i novac koje udruženje stiče u skladu sa Zakonom i ovim Statutom.

Član 46.

Udruženje može sticati prihode iz slijedećih izvora:

- članarine;
- dobrovoljnih priloga i poklona fizičkih i pravnih lica, kako u gotovini tako i u imovini i uslugama;
- ugovora sa javnim institucijama, fizičkim i pravnim licima;
- prihoda od kamata, dividendi, dobiti od kapitala, zakupnina, honorara i sličnih izvora,
- prihoda stečenih kroz ostvarivanje ciljeva i aktivnosti udruženja u skladu sa ovim Statutom;
- drugih izvora u skladu sa važećim zakonima.

Član 47.

O sticanju prihoda, korištenju imovine i raspolaganju sredstvima udruženja odlučuje Predsjednik udruženja u skladu sa ovim Statutom i opštim aktima udruženja koje donosi Skupština.

Član 48.

Udruženje je dužno uredno voditi poslovne knjige u skladu sa prihvaćenim računovodstvenim principima i sastavljati finansijske izvještaje, saglasno važećim propisima.

Član 49.

Predsjednik udruženja je dužan, najmanje jednom godišnje, podnijeti Skupštini udruženja izvještaj sa podacima o imovini udruženja, korištenju imovine, prihodima i rashodima udruženja i drugim pitanjima od značaja za raspolaganje imovinom i za finansijsko poslovanje udruženja.

Član 50.

Lice ovlašteno da potpisuju akte koji se odnose na sticanje i raspolaganje imovinom udruženja i na finansijsko poslovanje je: Predsjednik udruženja ili u odsustvu jedan njegov Podpredsjednik, kojeg sam ovlasti.

Član 51.

Svaki član udruženja ima pravo da ostvari uvid u poslovne knjige i drugu dokumentaciju u vezi sa imovinom i finansijskim poslovanjem udruženja.

Ostvarivanje prava iz prethodnog stava dužna je osigurati Skupština, najkasnije u roku od 15 dana od dana prijema pismenog zahtjeva člana udruženja.

Član 52.

Skupština udruženja može donijeti opšte akte kojima se, u skladu sa ovim Statutom, bliže uređuju pravila za ostvarivanje, korištenje i raspolaganje sredstvima udruženja za nadzor nad korištenjem tih sredstava.

Javnost rada

Član 53.

Rad udruženja je javan. Javnost rada udruženja ostvaruje se na način utvrđen Zakonom i ovim Statutom.

Član 54.

Organi udruženja (Predsjednik ili jedan njegov zamjenik ili Upravni odbor) su dužni da ovlaštenim predstavnicima sredstava informisanja učine dostupnim podatke, informacije i isprave koje se odnose na rad udruženja.

Predstavnici sredstava informisanja imaju pravo da prisustvuju sjednicama udruženja da izvještavaju o radu tih organa.

Član 55.

Članovi udruženja imaju pravo da budu redovno informisani o radu svih organa udruženja.

O informisanju članova udruženja stara se Predsjednik udruženja.

Član 56.

Izuzetno, opštim aktom koji donosi Skupština može se utvrditi da pojedine informacije, podaci i isprave predstavljaju poslovnu tajnu. Istim aktom mogu se utvrditi odgovorna lica za korištenje i zaštitu informacija koje imaju karakter poslovne tajne.

Za poslovnu tajnu ne mogu se odrediti podaci koji su javni po zakonu i drugim propisima, kao i podaci o kršenju zakona i drugih propisa.

Statut i drugi opšti akti udruženja

Izmjene i dopune Statuta

Član 57.

Inicijativu za izmjene i dopune Statuta može podnijeti svaki član udruženja. Inicijativa se podnosi Upravnom odboru udruženja, pismenim putem i sa odgovarajućim obrazloženjem, najmanje 30 dana prije Skupštine.

Član 58.

Prijedlog za izmjene i dopune Statuta utvrđuje Skupština. Utvrđeni prijedlog dostavlja se Skupštini udruženja, pismenim putem i sa odgovarajućim obrazloženjem, najmanje 30 dana prije dana održavanja sjednice Skupštine.

Član 59.

O izmjenama i dopunama Statuta odlučuje Skupština, većinom glasova ukupnog broja članova udruženja.

Član 60.

Predsjednik Skupštine potpisuje izmjene i dopune Statuta, koji se smatraju originalima i čuvaju se u arhivi udruženja.

Opšti akti udruženja

Član 61.

Pored Statuta, organi udruženja mogu donositi i druge opšte akte i to:

- odluke
- pravilnike i
- poslovnike.

Opšti akti udruženja moraju biti saglasni zakonu i Statutu udruženja.

Član 62.

Odluke, kao opšti akti, donose se u slučajevima kada je to izričito utvrđeno Zakonom i ovim Statutom, kao i u drugim slučajevima kada se na opšti način uređuju pitanja od značaja za ostvarivanje ciljeva udruženja.

Član 63.

Pravilnikom se na opšti način uređuju odnosi između članova udruženja kao i međusobni odnosi organa udruženja ostvarivanju njihovih nadležnosti.

Član 64.

Poslovníkom se bliže uređuje način rada organa udruženja u izvršavanju njihovih nadležnosti utvrđenih Statutom.

Član 65.

Originalni primjerci opštih akata udruženja čuvaju se u arhivi udruženja.

Zastupanje udruženja

Član 66.

Udruženje zastupa Predsjednik udruženja i Zamjenik predsjednika udruženja. Upravni odbor može donijeti odluku o ovlaštenju i drugog lica za zastupanje i utvrditi ovlasti.

Član 67.

Odlukom iz prethodnog stava Skupština će utvrditi i ovlaštenja, odnosno ograničenja ovlaštenog lica u zastupanju udruženja.

Član 68.

U postupcima u kojima udruženje učestvuje kao stranka radi ostvarivanja svojih prava, dužnosti i odgovornosti pred nadležnim organima, Predsjednik udruženja može dati pismenu punomoć za zastupanje advokatu ili drugom stručnom licu.

Statusne promjene

Pripajanje, razdvajanje i transformacija Asocijacije

Član 69.

Udruženje se može pripojiti drugom udruženju.

Član 70.

Udruženje se može razdvojiti na dva ili više udruženja.

Član 71.

Udruženje se može transformisati u udruženje od javnog interesa.

Član 72.

Odluku o pripajanju, razdvajanju ili transformaciji donosi Skupština udruženja na prijedlog Upravnog odbora.

Odlukom iz prethodnog stava se reguliše naročito:

- Nazivi udruženja koji nastaju razdvajanjem, odnosno naziv udruženja kome se udruženje pripaja ili naziv udruženja nakon transformacije u udruženje od javnog interesa, kao i sjedište i adresu;
- Podjela imovine, prava i obaveza;
- Ciljevi udruženja nakon razdvajanja, pripajanja ili transformacije;
- Imena osoba ovlaštenih za obavljanje poslova u podnošenju zahtjeva za upis u registar izvršene transformacije udruženja.

Član 73.

Odluka iz člana 74. Statuta smatra se usvojenom kada je na sjednici Skupštine prihvatila više od polovine od ukupnog broja članova udruženja.

Udruženje može osnovati privremeno ured ili kancelariju izvan svog sjedišta, radi promocije ciljeva statuta, simpozijuma ili kongresa.

Prestanak rada Asocijacije

Član 74.

Udruženje može prestati sa radom dobrovoljno ili po sili Zakona.

Član 75.

Udruženje prestaje sa radom dobrovoljno, ako Skupština dvotrećinskom većinom svih članova donese odluku o raspuštanju.

Član 76.

Istovremeno sa odlukom o raspuštanju udruženja Skupština donosi plan likvidacije udruženja, kojim se utvrđuje raspored imovine, prava i obaveza u skladu sa Statutom udruženja.

Skupština imenuje likvidatora udruženja čija je dužnost da se stara o izvršenju plana likvidacije i koji je ovlašten da zastupa udruženje u postupku likvidacije i u podnošenju zahtjeva za prijavu prestanka rada udruženja nadležnim organima.

Član 77

U postupku likvidacije udruženja iz imovine udruženja izmireće se sve dospjele zakonske obaveze, kao i obaveze nastale prema drugim povjeriocima udruženja, a eventualna preostala imovina rasporedit će se na drugo slično udruženje, a prema odluci Skupštine.

Prelazne i završne odredbe

Član 78.

Ovaj Statut stupa na snagu danom donošenja na Osnivačkoj Skupštini udruženja a primjenjivaće se od dana upisa udruženja u Registar kod nadležnog ministarstva.

Sarajevo, 28.12.2004. godine

Broj: 02/04

Predsjednik Skupštine

Prof.dr.sci.Dževad Čengić

OVJERAVA

Ministarstvo pravde

Sarajevo

Broj: 08-50.1-91/05

Sarajevo, 03.08.2005.g.

OVLAŠTENO LICE:

Raisa Selmanagić

Asocijacija infektologa u Bosni i Hercegovini Asocijacija infektologa u Bosni i Hercegovini

Асоцијација инфектолога у Босни и Херцеговини

Bolnička 25, 71000 Sarajevo

Association of Infectologists in Bosnia and Herzegovina

ID: 4201106270004

Tel. 033 297 019; Fax. 033 297 214

www.aibih.org e-mail: info@aibih.org

Broj: 03-4/17

Sarajevo, 11.3.2017. godine

Na osnovu člana 28. Statuta Asocijacije infektologa u Bosni i Hercegovini, Skupština Asocijacije infektologa u Bosni i Hercegovini je na svojoj sjednici dana 11.3.2017. godine u Sarajevu donijela slijedeću

ODLUKU

o izmjeni Statuta Asocijacije infektologa u Bosni i Hercegovini (AI BiH)

I.

Članak 5. Statuta se mijenja i sada glasi: „Sjedište udruženja je: Klinika za infektivne bolesti Sveučilišne kliničke bolnice Mostar, Kralja Tvrtka bb, 88000 Mostar“.

II.

Članak 10. Statuta se mijenja na način da se riječ „Sarajevo“ zamjeni s riječi „Mostar“.

III.

Ostale odredbe Statuta ostaju neizmjenjene.

IV.

Odluka stupa na snagu danom donošenja, a primjenjuje se od dana upisa promjena u Registru Udruženja kod nadležnog Ministarstva.

PREDSJEDNIK SKUPŠTINE

Prof. dr. sc. Jurica Arapović

Dostaviti:

1. Nadležno Ministarstvo 2x
2. Pismohrana

OVJERAVA

Ministarstvo pravde Bosne i Hercegovine

Sarajevo

Broj: UP09-07-1-1884/17

Sarajevo, 04.12.2017. godine

POMOĆNIK MINISTRA

Fazila Musić